



Yesus ntar ni manglartar fat Markus 1



¹⁶ Noak a ne, Yesus nmpan na twemul Galilea nof laran das. Ne i nkeban mangsinatwar du, ne ye Simon radu wain Andreas ma sir rfuat inar a na twemul dalam. ¹⁷ Ne Yesus nfalak ber sir feti, 'Milarat yakw! La yak kuftutu kmi ma

miftutu Ratu ni ngribatnir ber nuse nema tomwatar a ne rlarat dedesar Ratu'. ¹⁸ Ne sir rasusan nir fuat a ne ma rnau, nema ralarat Yesus. ¹⁹ Ne Yesus nmpan naloran, ne i nkeban tomwatar du, Yakobus mla Yoanes Sebedeus angkir. Sir ramtoran kumal dalam ma rafyafin nir fuat. ²⁰ Ne ye Yesus a ntar sir ma ralarat i. Ne rti a rtate amnir numur tomwat mangoskayar na kumal dalam, ne betno ralarat Yesus.

Yesus na dase snyompe dalam Markus 1



²¹ Nof a ne, Yesus numur ni mang-lartar rait a pnu Kafernaum. Ne ler Sabat ma nma ne, Yesus a nti dase snyompe dalam ma nafbwotin Ratu ni ngribatnir ber nuse. ²² Tomwatar ratriat ma rdengar i, fali Yesus natanuk nof i dalam, to far bain i agamar ma ratanuk nof buku dalam.

²³ Ne noak a ne, tomwat sa ma isnduan yatak nsung i lo namin dase snyompe dalam ma nafwayak feti, ²⁴ "Oo, Yesus ma mof Nasaret, ko ma mose safe ber kam? Ko mwa ma mubystate kam? Yak kufai fali ko mangondmel botuan mof Ratu!" ²⁵ Ne Yesus ntampu isnduan yatak a ne ma nfalak feti, "Mnwau ma mbwie tomwate ye!" ²⁶ Ne isnduan yatak a ne nawawan tomwate ne ma nafwayak, betno nbie i. ²⁷ Ne tomwatar ramriang ma rafalak ber sir feti, "O, safe ye? I natanuk nof ni arwaluk ma nfarete isnduan yatkar ma rlarat i!"

²⁸ Ne nof a ne ibar nof Yesus a ne mandilak ma nsorw monuk far nus Galilea.

Yesus nafngamone tomwatar yadin

Markus 1

²⁹ Ne Yesus numur ni manglartar rbie dase snyompe ne ma raktem Yakobus mla Yoanes rti Simon mla Andreas nir das. ³⁰ Mpe Yesus nait das dalam, i ndengar feti Simon yanan nafanas silai.

³¹ Ne Yesus nti Simon yanan sedin ma nomat liman ma npote i, ne nangamon desar, ne nlangun ma nalange i ber sir.

³² Mpe ndondam a ne, ne nuse ron mangafansar mla tomwatar ma isnduan yatkar a rsung sir far Yesus sedin. ³³ Ne pnue dalam rafburat sir a na dase soun lur. ³⁴ Ne Yesus nafngamone tomwatar ma nir maningkyar mla nalin kalin isnduan yatkar ma rbie sir. Ne i nfalir desar ber isndunir a ne ma ratanuk feti sir rafai i lo feti i ye botuan.

Yesus nfil ni manglartar buti resin dyu Markus 3

¹³ Ne ler famudi, Yesus nsail i far buburir sa das. Betno, i ntar tomwatar ma dalam i nmpeang, nema i nfil tomwat buti resin dyu nof sir. Ne tomwatar a ne rma Yesus sedin. ¹⁴⁻¹⁵ Betno i nfalak feti, "Yak kfwil kof a kmi ma myor yakw ma keta mti mifwibar Ratu ni ngribatin ngafelar ber nuse; mla kal kuase ber a kmi ma mitian isnduan yatkar ma rbie tomwatar."

¹⁶ I ye ma tomwate buti resin dyu a ne sir ngarnir feti, Simon, ma lrfamudi e, Yesus nafngare i na Petrus. ¹⁷ Betno, Yakobus mla Yoanes, Zebedeus angkir. Ne Yesus nafngare sir feti "Boanerges", isin feti "tarpake angkir", ¹⁸ Andreas, Filipus, Bartolomeus, Mateus, Tomas, Yakobus Alfeus anak, Tadeus, Simon ma rtar feti "mangyayat", mla Yudas Iskariot ma keta lrfamudi e nfule nbali ma nfendi Yesus.

Yesus nafline mnaur arwaluk

Markus 4

³⁵ Na lere ne ni lerdæ, Yesus a nfalak ber ni manglartar feti, "Mya ma mfyangat kumal ye nema tbase tusi far twemul Galilea bali sya." ³⁶ Mpa Yesus ni manglartar rfangat kumal a ne ma rti a rtate tomwatar yadin a ne na twemul serin, betno Yesus mla ni manglartar rose ma rtusi. Ne kumal walyetar ramin a ne nbal ma rose ma rtusi rlarat far bali sya nbal.

³⁷ Ne to dodo a nbal, mnaur arwalu mengarat a nbabal ma nsompir a nti kumal dalam mpa, kumal ketla nfen ber weye. ³⁸ Na kumal tabun Yesus narwa ma ulun i namin karang ulu das. Ne manglartar rpangun i ma rfalak feti, "Amang Tuangguru, safe ma to mfwaduli keta kit tatloram?" ³⁹ Ne Yesus npote i ma ntopu mnaur a ne, ne nfalak ber a twemul feti, "Mnwau! Mumlin motak!" Ne mnaur a ne ntolar i ma twemul a ne nose ma namlin desar.

⁴⁰ Ne Yesus a nyalak ber ni manglartar a ne feti, "Fali safe mir kateman mimtaut? Fali mir kateman to milele yakw fuk?" ⁴¹ Ne nir kateman rmetriat ne rafalak ber sir feti, "Tomwate ye ise botuan? Ma mnaur mla nerar ye rlarat i a nbal."

Yesus nfane tomwatar yadin

Markus 6

³⁰ Ne apostolar rballi sir far Yesus e sedin ma rafbwotim ma sir rose safe mla raftutu Ratu ni ngribatnir ber nuse. ³¹ Ne tomwatar yadin ti e ma e sir ma rwayat Yesus nor ni manglartar to rtame fuk mpa, Yesus nyalak ber ni manglartar feti, "Mya ma ti ain maline yo nema tsanari kit fen rufuk." ³² Ne sir koko sir rfangat kumal ma rtate ain i ne ma rti ain malinar sa. ³³ Ne tomwatar yadin rsalan sir ma rti a rtate ain i ne mpa, nuse ma rof a pnuar yadin rma ma rbalun sir far a no.

³⁴ La ma Yesus ntompur nof kumal a ne, ne nsalan tomwatar yadin ye, i nlompang resin sir, fali sir farlan dombar ma to rose ndunir. Ne Yesus a naftutu Ratu ni ngribatnir ber sir.

³⁵⁻³⁶ Titerik lerdæ, Yesus ni manglar-tar rfalak ber i feti, "Ain ye maline desar mla ketla ndondam lo mpa, ni ngafele ye, muluan nuse ma rti rselir tnyame na pnuar serin bal dyu a no!" ³⁷ Ne Yesus a nbali feti, "Kmi .myal motak tnyamar a ne ber sir!" Ne sir rendat feti, "Keta kam mal doit ngayadin mof mpe ma la mselir tnyamar ber sir?" ³⁸ Ne Yesus nendat feti, "Kmi mir rotyar fir? No mti mindiak!" Ne rof a ne rti rsalan ma rfalak feti, "Lan rotyar lim numur inar du!"

³⁹ Ne Yesus naluru tomwatar a ne ma rafkobal mpane sir ma ramtoran bubutwar a ne. ⁴⁰ Ne rafkobal sir ma ramtoran ma rrole sir, koplir ketnir ma rarar, ketnir ma butlilim.

⁴¹ Ne Yesus nal rotyar nenas inar a ne ma nmetngyade far langit ma nsompe

ber e Ratu. Betno napuse rotyar a ne ma nandende ber ni manglartar ma rasaman ber tomwatar monuk. ⁴² Ne tomwatar monuk rtame ma rabotan. ⁴³ Ne sir rafburat tnyam linyar a ne na botyar buti resin du ma rfen. ⁴⁴ Nemla merwanar ma rtame fafa ribun limar sa ntafal batar mla kangir.

⁴⁵ Ne Yesus naluan ni manglartar ma rfangat kumal ma rbalun rof i ma rti twemul balin sya na pnue Betsaida, nema i naluan nuse ma rbali sir far nir a pnuar. ⁴⁶ La ma Yesus ntate tomwatar a ne, i nsail i far bubuklr sa dās ma nsompe ber e Ratu.

Yesus nmpan nof weye das Markus 6

⁴⁷ Ne nait nal ndondam lo, Yesus ni manglartar na nir kumal dalam a ne lolone ramn na twemul twalelean, nemla Yesus koko i namin da retan. ⁴⁸ Ne i nsalan ni manglartar ma nawar-nowir sir ma rbese kumal a ne fali mnaur arwaluk nangal sir. Ne sesedin ngalawar, i nti setnir ne i nmpan nof weye das. Ne i nmpan nalaran farlan feti ma nlande sir.

⁴⁹⁻⁵⁰ La ma sir rkeban i ma nampan nof weye das, sir rafliak i feti isnduan mpa, rafwayak fali rmetriat mla ramtaut desar. Nempa Yesus natanuk nor sir ma nfalak feti, "Mifline kmi! Yakw ye io mpa, kete mimtaut!" ⁵¹ Betno i nfangat far nir kumal dalam, ne ye mnaur ntole i ma namlin a mpa, Yesus ni manglartar a ne ratriat ma ramriang desar. ⁵² Ne sir to rserap Yesus ni kuase rof ngrifaniak nof rotyar a fuk.

Yesus nfane tomwatar yadin

Markus 8

¹ Noak a ne ye, tomwatar yadin raffurat sir a nbal. Fali sir to nir a tnyam, Yesus ntar ni manglartar ma nfalak feti, ² "Yak kIWompang resin nuse ne, fali lerar tel ye dalam sir dedesar ma ror yakw mpa, to nir tnyam lo. ³ Keta kuluan ma rbali sir e, rfuf na dalamtene leti fali ramlingw nir lafar lo. Numur a nbal, ketnir rma rof nus dodo desar".

⁴ Ne Yesus ni manglartar rfalak feti, "Tamin lolo sasapat ain ye, keta tal tnyamar tof mpe ma dengan ber tomwatar yadin-yodin ye?" ⁵ Ne Yesus a nendat feti, "Kmi miktem tomwatar ye myond rotyar fir?" Ne nuse ne raendat sir ma rabutin rotyar a ne. Ne Yesus ni manglartar rbali feti, "Kam monuk-monuk mam rotyar itw".

⁶ Ne Yesus naiuan tomwatar a ne ma ramtoran ompak, betno nal rotyar itw ne ma nloik ma nsompe ber e Ratu. Ne betno npus rotyar a ne ma nandende

ber ni manglartar a ne nema rasaman a rrole tomwatar. Ne manglartar a ne rose rlarat. ⁷ Ne si nir in angkir lolone nbal. Ne Yesus a nal in angkir a ne ma nloik ma nsompe ber e Ratu, betno naluan ni manglartar nema rasaman inar a ne nbal. ⁸⁻⁹ Ne tomwatar a ne rtame titerik ma rabotan. Ne ma dine rtame merwanar a ne fafa ribun fat ntafal batar numur kangkir. Ne Yesus ni manglartar a ne rafburat tnyam linyar a ne na botyar itw titerik ma rfen. Ne betno Yesus naluan tomwatar a ne ma rbali sir far si nir a pnuar.

¹⁰ Ne Yesus numur ni manglartar rfangat kumal ma rtate ain a ne ma rbes ma rlande twemu' a ne ma rti yamrene Dalmanuta.

Yesus nmorip a nbal

Markus 16

¹ La ma Yesus nmat, bobole ne na ler Sabat* a ne ni ndondam, ne Maria Magdalena mla Maria Yakobus enan, numur Salome rselir ngule angat ngafelar ma ryefar na Yesus tenan farlan Yahudyar nir adat.

² Ma ni ler minggu, rsok bobolisin dalam, ne rti Yesus ni kubur ma felan bange. ³⁻⁴ Ne fali sir rafai feti bange kubur a ne ni bat fyofolat arwaluk resin mpa, mpe lolone dalamtene leti, raendat sir feti, "Ise ma keta nili kalin bat fyofolat i ne?"

Nempa, mpe rait a ne, sir rkeban feti bat fofolat a ne nbie ain lo. ⁵ Betno, sir rsung a nti bange kubur dalam a ne, rkeban tabwer sya ma nfonak maloli mafuti melawas namtoran bali sya fian, ne sir rmetriat desar.

* Yahudyar nir ler Sabat farlan ler silai na ler Sabtu.

⁶ Ne tabweri ne nfalak ber sir feti, "Kete mimtaut! Kmi mindiak Yesus ma nof Nasaret, ma rfen I a na sangwalu ma rfele I a na ye. Msyalan motak ain ye-l to namin lo! Ratu nafmworip I nof mamate! ⁷ Mpa farane, mti mfyalak ber Yesus ni manglartar numur Petrus feti, 'I nbalun far Galilea. La mkyeban I a .na no, farlan ma nfalak ber a kmi".

⁸ Betno sir rafla rbie bange kubur a ne. Sir raruruku, fali ramtaut ma nlie nlengan desar. Ne sir to rasaur sasaf ber ise-nde-ise, fali ramtaut rut.

